

Non te Pontificum luxus, non Insula tantum
Ornavit, diri quæ tibi causa mali,
Glottiade quantum decorant te, Glasgua, Muse,
Quæ celsum attollunt clara sub astra caput.
GLOTTA decus rerum, piscosis nobilis undis,
Finitimi recreat jugera leta soli.
Ast Glottæ decus, & vicinis gloria terris
Glasgua fecundat flumine cuncta suo.

ADDIT. [Et Arturus Ionstonus sic cecinit de Glasgua:

Glasgua, tu socias inter caput exeris urbes,
Et te nil ingens pulchrius orbis habet.
Sole sub occiduo Zephyri te temperat aura,
Frigora nec brumæ, nec Canis ora times.
Glotta latus cingens electro purior omni est,
Hic regis imperio lintea mille tuo.
Pons jugat adversas operoso marmore ripas,
Et tibi securum per vada præbet iter.
Æmula Phæacum tua sunt pomaria sylvis,
Ruraque Pastanis sunt tibi plena rosis.
Farra Ceres, armenta Pales, Thetis agmina gentis
Squammigera, nemorum dat tibi Diva feras.
Tecta nitent, ipsas & tangunt vertice nubes,
Quo commendentur plus tamen intus habent.
Templa domos superant, radiant hæc marmore puro
Marmoris & pretium nobile vincit opus.
Non procul hinc Themidis se tollunt atria, patres
Hic ubi purpureos dicere jura vides.

In medio residens sua pandit limina Phæbus,
Hic cum Permeſſo Pegasis unda fluit.
Civibus ingentes animos Deus armiger, artes
Nata Iovis, stabiles Iuno ministrat opes.
Mœnia Dardanidum posuit Gryneus Apollo,
Et Deus æquoreis qui dominatur aquis.
Glasgua, te fausto struxerunt fidere Divi,
Quot mare, quot tellus, quotquot & æther habet.

Insignia civitatis Glasguæ.

Salmo, quercus, cui insidet rubecula avis, campana, &
annulus aureus salmonis ore exertus.

Salmo maris, terraque arbor, avis aeris, urbi
Promittunt, quicquid trina elementa ferunt.
Et campana (frequens celebret quod numinis aras
Vrbs) superesse polo non peritura docet.
Neve quis indubitet sociari æterna caducis,
Annulus id, pignus conjugiale notat.

Almæ genitricis memor raptim fundebat
Robertus Magnus, Medicinæ Doctor &
Professor in Academia Glasguensi.

De eadem sic olim cecinit Marcus
Alexander Bodius.

Glotta maris soboles, liquido cui præsidet amni
Glasgua, sanguinei Martis & artis amor.]

